

## 2 JOON

### Riown Wargahng Agweed Joone Rob Ke Nying Warga

Riown warga gihr Joon anaa agweed ke ngaa duohng akuud yaa ayiihe ne oohr yihr dhaar akwany Juoge kedea joe. Lum yea kejea warga aohr ke yihr akuud yaa yiiho giuh yi paajo. Warga arubo kaa nying nhyaar rog kedea toohn nyoge ke nying yaa ucahb kedea puohny gihr gen.

#### **Kaa Acaan Luube**

Lum umodho 1-3

Ka ne wiuh nhyahre maalo kii ngo 4-6

Toohn ke nying loohng ucahb 7-11

Gug luube 12-13

<sup>1</sup> A ge ngaa duohng akuud yaa yiiho, an ne gweehd yihri yih dhaar akwany Juoge ne beehd yihdh yaa ayiih Juog. Wargahng ni gweeda yihri kedea yihr joi. Kedea wu beehda nyoge maa anhyaara ne cohg. Padh a keede e ne nhyaar wun, abea wu anhyaar yaa ngahy giuh beeye ge anyoadh Juoge thiow.

<sup>2</sup> Ge nyoge me beehdo kaa dhe yoohn giuh beeye ge anyoadh Juoge wa kaa arob Juoge ngo yihro.

<sup>3</sup> Beehn Juog Wuure kedea Jeacuu Kriihjto Waahde cub gene muuny maa doohr gihr gen yihro kedea duu gene cwihny gen caahn bango.

Yug gene giih ni yihro maano e wo beehdo kaa dhe yoohn adiehj giih anyoadh Juoge kedea e wo beehd e wo nyaar rogo.

### *Loohng Rubo Ke Nying Nhyaahro*

<sup>4</sup> Joi mooge me bang gen alihnga cwihnya amihno rog gen keraahyo. Cwihnya amihno bang gihn ge beehdo kaa dhe yoohn giih beeye ge anyoadh Juoge, maa wa kaa arob Juoge ngo yihro kejea dhiilo gen ke yugo.

<sup>5</sup> Gihn, e ne roba yihri yih dhaar anhyaar. Dhiilo beehdo e rogo nyaaro nyaaro. Rob ke nying nyaahro padh rob me nyaahn me kuu akuong ke lihngo e gihn gweehda yihri ke nyinge. Beehda loohng maa alihngo ke coon ge athubo ke yih lum Jeacuu.

<sup>6</sup> Nhyaahro me ne cohg beehda ne beehdo e wo tiihy giih arob Juoge. Beehda gihn me ngahyo ke cahng ayiiho lum Jeacuu kedea gihn ngo anaa angweel Juoge piny kejea niid nyaahro yi beehdo gihro.

### *Jo Mahn Giih Jeacuu*

<sup>7</sup> Giih ni ge aroba bang gihn paajo yea apaahng ke yaa ucahb. Ge apiih ne puohny giih toohd kob gene kejea Jeacuu Kriihjto kuu abeehn wiih piny kan e yihre ne kuohm wa mar dhaano utaahngo. Kwaad ngaa me puohnyo wa maano, ngo beehda ngad ucahb me dwaahng nyoge kedea e naa ngad mahn gih Jeacuu.

<sup>8</sup> Noono e kea koaru rogu beere tiihj gihru yihru Juog wiihe be taay piny Kedeá beere akoohg ucub Juoge yihru ke nying tiihyu yoadu yoado cang.

<sup>9</sup> Aroba yihru kejea ngad mad giih mooge yihdh giih apuohny Ngad Boadh nyoge ge ayiihe kedeá be bar maalo ke yiih puohny Ngad Boadh nyoge padh ngaa maa anweehd keehd Juog. Abea ngaa bar maalo ke yiih puohny Jeacuu, ngo beehda anweehd keehd Juog Wuur kedeá Jeacuu Waahde.

<sup>10</sup> Noono, nea dhaano beehn bangu abea puohnye be room ke giih puohny Ngad Boadh nyoge, e ngaan nu keá meehgu beehdo ke wun. Thiow keá ngaa maahdh ngo kejea ngo beehda ngad akuud.

<sup>11</sup> Kwaad ngaa maahdh ngo, e ngaan nu amahdo ke ngad ucahb kedeá adoohng ne ngaa me kony ngo yi giih reje tiihye.

<sup>12</sup> Giih me thoohdh me daahda ke rob yihru nud. Abea a be daahd ugweeda gen yi warga wa kwaad gihn. Gihn daahda kedeá gihn ngo gaahna gaahno beehda an e nuu ubeehn ne lieu wun. Kaano arumo, e wo upiih ne rob kedeá e naa ka udoohng cwihnyo med.

<sup>13</sup> Nyethea nyemiihu, nyemiihu ge akwany Juoge ne beehd yihdh yaa akuud, yih amaahdh gene.

## **Luwo**

### **Luwo: Anweehd Me Nyaahn New Testament**

copyright © 2003 Wycliffe Bible Translators, Inc.

Language: Luwo

Contributor: Wycliffe Bible Translators, Inc.

All rights reserved.

2025-05-10

---

PDF generated using Haiola and XeLaTeX on 10 May 2025 from source  
files dated 10 May 2025

ba8353b1-57d5-55f2-870a-7ae8e7acbe62